

Date – 06/04/2026

Time - 18:30 -18:40Hrs

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Mizoram sorkarin February ni 2 atanga May ni 30 inkara support price awma kut hnathawktute sawhthing hralh tura a ruahman zaa 7.89 a hralh tawh.
2. Mizoram Sorkar in Jordan Centre enkawl tura Mizoram Synod a inrem pui hnuah vawiin khan Social Welfare Department hotute leh Mizoram Synod hotuten an enfiah a.
3. Assam, Keralam leh Puducherry ah te naktukah Assembly inthlan campaign a tawp dawn tawh avangin Political Party ten theihtawp an chhuah
4. Supreme Court chuan contract inpek dan diklo chungchangah Arunachal Pradesh Chief Minister Pema Khandu lakah preliminary inquiry ti turin Central Bureau of Investigation (CBI) a hriattir.

<><><>

**GINGER**

Mizoram sorkarin February ni 2 atanga May ni 30 inkara support price awma kut hnathawktute sawhthing hralh tura a ruahman zaa 7.89 a hralh tawh.

Mizoram Agriculture Marketing Board (MAMB) co-chairman Dr. K.C. Lalmalsawmzauva hnen atanga Akashvani News Aizawl thudawn danin, February ni 2 atanga support price awma kut hnathawktuten sawhthing an hralh theih hun chhung tura ruahmanna kal mekah nimin April ni 5 thleng khan sawhthing hralhna hmun tur bika ruahman Secondary Collection Centre (SCC) 64 zinga SCC 28 - Aibawk, Chawngtlai, Cherhlun, Chhingchhip, Farkawm, Hnahlan, Hnahthial-I, Kanghmun, Khawhai, Khawlailung, Khuangleng, Mamit, Mualkawi, Ngopa, North Vanlaiphai, North Mualcheng, Phullen, Ratu, Reiek, Sialhawk, Tawipui North 1, Thingdawl, Thenzawl, Tipa, Tuidam, Tualcheng, West Phaileng leh Vaphai atangin sawhthing kg nuai 27, sing 3, sang 2,098 chu cheng nuai 7,96, sing 4, sang 4,342-a hralh a ni tawh a ni.

Kan corr report ngaithla ang.

*Mizoram Sorkar chuan February ni 2 atang khan SCC katlangin loneitute Sawhthing lei tum mahse sumdawngten kut hnathawktute sawhthing an leina man hniam ber tura a bituk, Reserve Price chu cheng 40 atanga 45 inkar a ni a, a san em avangin leitu an awm mai lova, February ni 9 khan Reserve Price chu cheng 30-35*

*inkarah tihniamin SCC pahnih- Mamit leh Tuidam atangin sawhthing chu hralh chhuah chauh a ni a. SCC 28-ah te hian sumdawngte chuan sawhthing chu kg-ah cheng 25 atanga cheng 30 inkarin an lei mek a, sorkarin ba awm loa lei tura sumdawngte a tih angin sumdawngte hian an sawhthing leina man hi kut hnathawktute hnenah an pe vek tawh a, sorkar erawhin support price chu hralh zawh hunah a pe chauh dawn thung a ni.*

*MAMB-in support price awma sawhthing hralh theih hun tura a bituk chu February ni 2 atanga May ni 30 thleng a ni a; SCC 64-a sawhthing awm zat tura tarlan chu quintal nuai 3, sing 4 , 6,470 niin, tuna sumdawngten an lei tawh zat hi a vaiin quintal sing 2, sang 7, 320.98 a ni a, hralh tur zat atanga zaa 7.89 a ni.*

<><><>

## **DGP-**

Police Modernisation hnuai atanga lei, electric scooter 15 chu DGP Pu Sharad Agarwal an vawiin khan Police Station hrang hrang leh Aizawl Traffic Police hman turin Police Headquarters kawt atangin a vai liam.

He hunah hian DGP chuan heng Electric Scooter te hi hmeichhiate himna'n leh khawtlang ralmuan zawkna atana hman tura lei a nih thu sawiin, a dawngtu ten Patrolling nan leh khawtlang ralmuanna atan tangkai taka hmang turin a chah a ni.

VC

*Mizoram Police tih changtlunna atana hmalakna atan vawiin khan DGP Pu Sharad Agarwal a chuan Electric Scooter 15, Ather Company siam chu a vailiam a, heng scooter te hi*

<i>Aizawl Police Station tan</i>	-	2
<i>All Women Police Station tan</i>	-	1
<i>Bawngkawn Police Station tan</i>	-	2
<i>Vaivakawn Police Station tan</i>	-	2
<i>Kulikawn Police Station tan</i>	-	2
<i>Zonuum Outpost tan</i>	-	1
<i>Aizawl City Traffic Police tan</i>	-	3 bakah

*Lunglei Police Station leh Champhai Police Station tan 1 ve ve lei a ni a, vehimna hna thawk tura khawlai fanna Patrolling nan leh khawtlang ralmuanna atana a tul anga hman tangkai tura ruahman a ni.*

<><><>

## **SOCIAL WELFARE DEPT**

Mizoram Sorkar in Jordan Centre Mizoram Synod enkawl tura kum 15 atan inremna a ziah pui hnuah vawiin khan Social Welfare Department hotute leh Mizoram Synod hotuten an enfiah a.

Social Welfare Department hi Joint Secretary Pi Zonunthari hovin an kal a, Mizoram Synod lam hi Moderator Rev John Raldosanga bakah Synod Social Front

atangin Rev K. Lallawmzuala, Executive Secretary, Rev P. Zohmangaiha, Secretary, Rev. Lalrinmawia leh member dang mi 3 an kal a ni.

*VC*

*Jordan Center ah hian Qtrs building 9, chhungkaw 30 vel awm theihna te, Office building, damdawi in bakah hmeichhia leh mipa ruihhlo ngai enkawlna hmuna hrang ve ve a awm a. Ministry of Social Justice & Empowerment norms leh guidelines anga din a nih avangin building hrang hrang Counselling, detox, recreation, dorm, chapel leh a dangte a awm kim hle a. Building te hi lian vak lo, a hrang hrang a nih avangin tun dinhmunah mi 70-100 bak an leng lova. A za vaiin building hlan chhawn tur hi 40 a awm a, Repair ngaite leh thil mamawh belh te enho nghal a ni.*

*Sorkar leh Synod inremna angin Jordan Centre hmunhma, building leh a chhung bungrua awm te hi a nih ang ang a inpek turin an lo inrem tawh a, Synod lam hian June thla SEC ah an kalpui dan tur hi an rel fel dawn a ni.*

<><><>

## **PUKPUI**

Lunglei Pukpui Mizoram Engineering College din tur chu Mizoram Sorkar ruahmanna angin kumin Academic Session, July thla hian Class tan tur a hmalak mek a ni a, tunah hian a panna kawng, tui leh eng lampang te PWD, PHE leh P&E Deptt ten an buaipui mek a, chaktaka hmalak a ni tih kan corr thudawna chuan a sawi.

He Engineering College-ah hian Civil Engineer leh Computer Engineer zirna hawn phawt a ni ang a, seat 30 ve ve hawn a ni ang. A zir tur te hi JEE paltlang an nih a ngai a, a bak chu Entrance Test kalpui a ni leh ang a, Mizoram Polytechnic Lunglei atanga Diploma in Civil leh Computer Sc zir zo an awm chuan Entrance Test hi an ti thei ang a. Principal puitling an la awm dawn chiah loh avangin MPL Principal nilai Pu Lalnunluanga chu Acting Principal atan a dah a ni a, thawktu dangte erawh la lak zui tur ni a sawi a ni.

<><><>

## **ZPM THALAI**

ZPM Thalai Gen Hq chuan Aizawl Brigade Field-a AMC Play Ground enho puiah MNYF President Pu Robert Romawia Royte chu an sawm a, an sawmna hi a pawmpui thu leh hemi zawh hian New Delhi-a Mizoram tana sum dah SASCI sum lapse dan enho puiah a sawm let bawk.

ZPM Thalai President Pu Jeje Lalpekhluva hova vawiina OB Meeting chuan thuchhuah siamin, tunhnaia MNYF President Pu Robert Romawia Royte-in Press Conference nei a, AMC Play Ground Brigade field-ah sum hmanna dik lo a awm anga a sawina chu veng mipuite leh thalai infiammite zah lohna ah an ngaih thu sawiin, Pu Robert Romawia Royte chu a hman hun leh ni te ZPM Thalai hriattir a, ama ho ngei a Bridge field siam dan en ho puiah an sawm a ni.

Hemi chungchanga Akashvani News Aizawl zawhna chhangin MNYF President Pu Robert Romawia Royte, Hachhek Bialtu MLA chuan ZPM Thalaiten thutak taka an sawm a nih chuan a pawm thlap a ti a, chutihruah chuan an en zawh hnuah chaw te ei hovin, New Delhi-a Finance Ministry-a Department of Expenditure-ah Mizoram tana sum dah liau liau, SASCI sum lapse dan chungchang chu chiang zawka an hriat theih nan kalpui turin a sawm a, hei hi Mizoram leh ZPM thalaite tan hlawkna a nih a rin thu sawiin, Delhi-a zin pui turin a in peih reng tih a sawi a ni.

Byte: Pu Robert Romawia Royte

Inrinni kaltaa Press Conference a kohah MNF thalai President Pu Robert Romawia Royte chuan AMC-in Bawngkawn Brigade Field a siamnaah thildiklo a awm ni-a sawi chungchangah Pu Robert Romawia Royte chuan, thil dik lo a awm ni-a sawituin enga tinge action an lak loh a ti a, AMC chu inthlang tur an ni a, miin an rinhlelh theihna atan an sawi mai mai a a ngaih thu a sawi a, Bawngkawn Brigade Field chu phullem phahna tura sum sanction a ni lo a. Hemi chungchang hi CBI te, ACB te'n chhui se a duh thu sawiin, chhui tir duh si lo a mipui rinhlelh tawk leka sawi chu a puitling lo a ti. Pu Robert Romawia hian hemi tum hian ZPM sorkar kum 2 leh tlem chhung lekin SASCI Part-I hnuaiyah vawi 2 sum tam tham tak, cheng nuai 34,483 a lapse a tih a sawi bawk.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



#### ELECTION CAMPAIGN

Assam, Keralam leh Puducherry ah te naktukah Assembly inthlan campaign a tawp dawn tawh avangin Political Party ten theitawp an chhuah a. Assam ah hian seat 126 ah inthlan a ni ang a, Keralamah seat 140 leh Puducherry ah seat 30 ah Ningani ah inthlan a ni ang. Senior BJP leader leh Prime Minister Narendra Modia chuan vawiin khan Assam-a Barpeta ah vantlang inkhawmah thu a sawi a. Pu Modia chuan BJP in a zawna vawi thumna turin Assamah sawrkar an siam dawn tih a sawi a. Congress chu hun reilotea politics hamthatna uma puhin Pu Modia chaun BJP chu hma hun thui tak thlir chungah hna thawk an ni a ti a. Viksit Bharat hmathlir peng pakhat Viksit Assam tihlawhtling turin an thawk a ni a ti.

(Byte of PM Modi)

Congress leader senior leh Lok Sabha Opposition Leader Rahul Gandhi chuan vawiin khan Puducherry a Lawspet ah thu a sawi a. Pu Gandhi-a chuan Puducherry tana state puitling nihna pek chu Congress intiamna anih thu a sawi.

(Byte of Rahul Gandhi)

Keralam ah chuan Senior BJP leader leh Union Home Minister Amit Shah chuan Haripad ah thu sawi a. Senior CPM leader leh Keralam Chief Minister nilai Pinarayi Vijayan chuan vawiin khan an sawrkar hlawhtlinna hrang hrang a tlangzarh a. CPM General Secretary M.A.Baby pawhin Kallam district ah hun hmang bawk a ni.

Hetihlai hian vawiin khan Tamil Nadu Assembly inthlan leh West Bengal inthlan thawhkhatna chuh tumte tana nomination thehluh hun chu a tawp a. Tun thla ni 9 thleng inhnudawhna hun hawn a ni a. Tamil Nadu ah hian seat 234 ah vote thlak a ni ang a. West Bengal ah hian inthlan thawhkhatnaah seat 152 ah vote thlak a ni dawn a. Tun thla ni 23 ah inthlan a ni ang a. Tun thla vek ni 29 ah West Bengal Assembly inthlan thawh hnihna hi neih a ni ang.

<><><>

## **ARUNACHAL CM**

Supreme Court chuan contract inpek dan diklo chungchangah Arunachal Pradesh Chief Minister Pema Khandu lakah preliminary inquiry ti turin Central Bureau of Investigation (CBI) a hriattir. Contract inpek dan fello awma puhnaah hian Chief Minister Khandu leh a chhungte an inhnawih nia puh a ni a. Court chuan kar 16 hnuah report pe turin a hriattir a. Preliminary Inquiry tih zawhah hian CBI chuan chhui zui zel tlak anih chuan a chhui chhonzawm dawn a ni. CBI te hian January 2015 atanga December 2025 chhunga contract inpek dan an chhui ang.

<><><>